

Pa logra hazaña p'e Mega Museo

Heintje Ras lo keda 100 dia den Mina di Fosfaat

FUNDACION Museo di Antigüedad nos Bieunan Aruba (FMANBA) ta presenta na pueblo di Aruba un evento di 'Hazaña Mega Museo Aruba 2021. Manera nos a bin ta prepara p'e tremendo hazaña di sr. Henry 'Heintje' Ras, kende lo bay haci e hazaña aki dor di keda 100 dia den e cuebanan di mas grandi di Aruba, cu t'e Mina di Fosfaat p'asina recauda fondo p'e Mega Museo Aruba (Fundacion Museo di Antigüedad nos Bieunan).



Un tiki di e mina di fosfaat di Aruba Sr. Henry 'Heintje' Ras tin basta aña caba ta haci tournan den Mina di Fosfaat, tanto pa nos hendenan local y turista.

Tabata na aña 1873 cu sr. J.H. Waters Gravenhorst a descubri Fosfaat na Sero Colorado y na Sero Colebra. E tempo aya cu e trein di Aruba Phosphaat Maatschappij (AFM) cu a wordo funda den december na aña 1879 tabata transporta e fosfaat p'e barconan. Un totaal di 20 wagon a ser uza pa transporta e fosfaat.

A traha un rail di tram di 6 kilometer for di e Mina na Sero Colorado te n'e waf di San Nicolas p'asina transporta e fosfaat p'e wordo exporta den barconan di bela pa Francia, Inglatera, y Spaña. E Fosfaat tabata tin Acido Fosforico den dje, di cual el a wordo uza como e.o. Fertilisante pa mata. Pa 15 aña mas un otro 15 aña fosfaat a wordo saca fo'i Aruba y a exporta esaki.. Esaki ta djis un tiki di e historia. Y sr. Henry 'Heintje' Ras semper ta bisa: E muchanan y pueblo di Aruba tin derecho di sa di nos historia!

Awor nos ta dilanti di un evento cu lo t'e Hazaña Mega Museo Aruba 2021 caminda cu Henry 'Heintje' Ras, kende for di hopi aña caba banda di ta un bombero di profesion, ta un coleccionista di artefacto y obhetonan hopi anticua y historico. Tambe e tin un coleccion di varios auto clasico y di basta aña bieu. Pa medio di tur e coleccionnan aki su cas a bira un cas museo. Dia 3 di mei 2019 el a funda Fundacion Museo di Antigüedad nos Bieunan Aruba cu ta situa na su propio cas na Rooi Master # 5-E na Brazil. Pero sr. Heintje Ras tin un deseo, un soño, un pasion e mundo aki di colecciona articulo, artefacto y obhetonan hopi anticua y historico, manera disco, tocadisco, diferente hero di strika, telefoon, camaranan, machin di mula, machin di cose, etc. y su cas a bira chikito pa tur e inventario cu e tin di coleccionnan bieu.

E Hazaña Mega Museo Aruba 2021 t'e evento cu sr.

Heintje Ras ta desea di realisa no solamente pa recauda fondo pa yega na su edificio di Mega Museo Aruba, sino tambe pa pone Aruba su nomber na laira. Esaki dor di haci e hazaña aki tambe ta pa kibra recordnan mundial internacional den e Buki di 'Guinness World Records'. Nan ta un grupo di boluntario cu ta apoyando y preparando esaki pa sr. Heintje logra su soño di un Mega Museo. Caminda cu sr. Ras lo bay ta keda 100 dia den e Mina di Fosfaat na Sero Colorado, bou di tera den e tunel di e mina na unda cu lo e dreña dia 2 di october 2021 y sali riba dia 9 di januari 2022 pa kibra e record mundial.

E ekipo ta conta masahistanan, sr. Willy Willems y nutricionista profesional, sr. Rene Wild, kende ta certified personal trainer y precision nutricision level 1 y 2 nutricionist, su huisarts, ex-hefe di bombero, sr. Jaime Lacle, kende ta pensionado, Director di BRA, sr. Rino Hermans y su Departamento lo haci un training durante e hazaña y boluntarionan balente. Nan ta spera cu pueblo di Aruba, comerciante, sector di turismo, hotelero, banconan y un y tur apoya e yiu di tera aki den su hazaña pa logra e fondonan pa realisacion di un Mega Museo Aruba.

For di awor caba lo por cuminsa na haci donacionnan online riba e cuenta di Banco RBC # 7700000100257292 of yama 7330270 of 5632121

Sr. Janiro 'Atanero' Eisdén lo percura p'e eventonan musical durante e 100 dianan y nan ta spera cu nos artistanan grandi lo forma parti y apoya e evento aki. Nos ta desea di gradici sra. Kamini Kurvink, kende a acepta mesora p'e lugar Kamini's Kitchen t'e cede di encuentro y reuni cu prensa di tanto local como internacional. E bon noticia aki pa Aruba lo crea un union fuerte den nos comunidad Arubano.

Na nomber di Fundacion Museo di Antigüedad nos Bieunan Aruba y staf di Hazaña Mega Museo Aruba 2021 ta desea sr. Henry 'Heintje' Ras tur clase di exito!